



**LEMBAGA PENGARAH**  
*BOARD OF DIRECTORS*

Rujukan Kami : UPM.PEND.100/1/6/1(1)

Tarikh : 15 November 2021

**ARAHAN PENTADBIRAN UPM BILANGAN 1 TAHUN 2021**

**PELAKSANAAN IMUNISASI COVID-19 BAGI PEGAWAI  
UNIVERSITI PUTRA MALAYSIA**

**TUJUAN**

1. Arahan Pentadbiran ini bertujuan menjelaskan dasar pelaksanaan imunisasi COVID-19 bagi pegawai Universiti Putra Malaysia.

**LATAR BELAKANG**

2. Kerajaan telah melaksanakan Program Imunisasi COVID-19 Kebangsaan (PICK) mulai 24 Februari 2021 untuk mengurangkan kesan jangkitan akibat virus COVID-19.

3. Dalam usaha untuk memberikan keyakinan dan jaminan kepada orang awam serta memastikan kelancaran penyampaian perkhidmatan awam kepada rakyat, Kerajaan telah menetapkan supaya semua pegawai melengkapkan imunisasi COVID-19.

4. Seseorang pegawai adalah tertakluk dan terikat kepada syarat-syarat perkhidmatan universiti selaras dengan Seksyen 4.(1)(r) Perlembagaan Universiti Putra Malaysia (P.U. (A) 448/2010) dan Surat Aku Janji yang ditandatangani oleh pegawai apabila dilantik ke dalam perkhidmatan universiti dan hendaklah mematuhi, antara lain, apa-apa pekeliling, surat pekeliling, peraturan dan arahan lain yang dikeluarkan oleh Universiti dari semasa ke semasa sepanjang perkhidmatannya di Universiti.

5. Seterusnya, subperaturan 20(8) P.U. (A) 1/2012 memberi kuasa kepada Ketua Jabatan untuk mengarahkan mana-mana pegawai yang sedang berkhidmat untuk mengemukakan maklumat kesihatan bahawa pegawai telah mendapatkan dos imunisasi COVID-19 yang lengkap.

6. Oleh itu, Arahan Pentadbiran ini dikeluarkan selaras dengan Subseksyen 27(1) Akta Badan-Badan Berkanun Tatatertib Dan Surcaj 2000 (Akta 605) yang memberi kuasa kepada Lembaga untuk mengeluarkan dari semasa ke semasa apa-apa arahan pentadbiran berhubung dengan kelakuan dan tatatertib pegawai-pegawai Universiti Putra Malaysia.

7. Dalam hal ini, apa-apa tindakan seorang pegawai hendaklah selari dengan dasar Universiti dan dasar Kerajaan berhubung dengan pelaksanaan imunisasi COVID-19.

## TAFSIRAN

8. Bagi maksud Arahan Pentadbiran ini –

- (a) "imunisasi" mempunyai erti yang sama yang diberikan kepadanya dalam subseksyen 2(1) Akta Pencegahan dan Pengawalan Penyakit Berjangkit 1988 [Akta 342];
- (b) "pegawai" mempunya erti yang sama seperti yang diberikan kepadanya dalam Perlembagaan Universiti Putra Malaysia (P.U. (A) 448/2010) dan termasuklah guru dan pekerja Universiti mengikut tafsiran dalam Perlembagaan yang sama;
- (c) "pengamal perubatan berdaftar" mempunyai erti yang sama yang di berikan kepadanya dalam peraturan 4 P.U. (A) 1/2012 dan bertugas di Pusat Kesihatan Universiti Kampus Serdang ("PKU") atau Klinik Satelit Kampus Bintulu ("Klinik Satelit"); dan
- (d) "Sijil Digital Vaksinasi COVID-19" ertinya sijil imunisasi COVID-19 yang dijana daripada aplikasi MySejahtera.

## DASAR BAHARU

9. Pegawai adalah bertanggungjawab untuk mendapatkan dos imunisasi COVID-19 yang lengkap sebagaimana yang ditetapkan oleh Dasar Imunisasi COVID-19 Bagi Pegawai Dan Pelajar Universiti Putra Malaysia. Ini bertujuan untuk memastikan persekitaran tempat kerja termasuk persekitaran pengajaran dan pembelajaran yang selamat dan penyampaian perkhidmatan serta produktiviti perkhidmatan di Universiti berada pada tahap yang optimum.





## PELAKSANAAN

10. Pada atau selepas 1 November 2021 –
- (a) pegawai boleh diarahkan oleh Ketua Jabatan untuk mendapatkan dos imunisasi COVID-19 yang lengkap dengan cara mengemukakan Sijil Digital Vaksinasi COVID-19; dan
  - (b) mana-mana pegawai yang gagal mematuhi arahan Ketua Jabatan boleh menyebabkan pegawai dikenakan tindakan tatatertib atau ditamatkan perkhidmatan.
11. Sekiranya pegawai –
- (a) tidak dapat melengkapkan dos imunisasi COVID-19 atas sebab kesihatan, pegawai boleh diarahkan oleh Ketua Jabatan untuk membuat pemeriksaan kesihatan di PKU bagi pegawai di Kampus Serdang, atau di Klinik Satelit bagi pegawai di Kampus Bintulu bagi mengesahkan bahawa pegawai tidak layak untuk menerima imunisasi COVID-19 dari segi perubatan (*medically ineligible*);
  - (b) telah mendapat pengesahan daripada pengamal perubatan di atas bahawa pegawai tidak layak untuk menerima imunisasi COVID-19 atas sebab kesihatan, pegawai boleh diarahkan oleh Ketua Jabatan untuk membuat ujian pengesanan COVID-19;
  - (c) disahkan oleh pengamal perubatan berdaftar bahawa pegawai layak untuk menerima imunisasi COVID-19, pegawai boleh diarahkan oleh Ketua Jabatan untuk mendapatkan dos imunisasi COVID-19 yang lengkap dengan cara mengemukakan Sijil Digital Vaksinasi COVID-19; dan
  - (d) gagal mematuhi mana-mana arahan di perenggan (a), (b) atau (c), pegawai boleh dikenakan tindakan tatatertib atau ditamatkan perkhidmatan.
12. Walau apa pun ketetapan di perenggan 10 dan 11, Ketua Jabatan boleh, pada bila-bila masa, mengarahkan mana-mana pegawai yang belum mendapatkan dos imunisasi COVID-19 yang lengkap untuk membuat pemeriksaan kesihatan bagi menentukan status kesihatan terkini pegawai. Sekiranya pengamal perubatan berdaftar mengesahkan pegawai layak untuk



mendapatkan imunisasi COVID-19, pegawai boleh diarahkan oleh Ketua Jabatan untuk mendapatkan dos imunisasi COVID-19 yang lengkap dengan cara mengemukakan Sijil Digital Vaksinasi COVID-19. Mana-mana pegawai yang gagal untuk mematuhi arahan tersebut boleh dikenakan tindakan tatatertib atau ditamatkan perkhidmatan.

13. Bagi memastikan pelaksanaan dasar ini berjalan dengan lancar, Ketua Jabatan boleh mempertimbangkan apa-apa kaedah yang bersesuaian untuk menguruskan mana-mana pegawai yang tidak mendapatkan atau melengkapkan imunisasi COVID-19 termasuklah mengarahkan pegawai untuk membuat ujian pengesanan COVID-19. Apa-apa kos yang berbangkit daripada ujian pengesanan itu hendaklah ditanggung sendiri oleh pegawai.


14. Walau bagaimanapun, bagi pegawai yang tidak layak untuk menerima imunisasi COVID-19 dari segi perubatan (*medically ineligible*), kos untuk membuat ujian pengesanan COVID-19 akan ditanggung oleh Universiti Putra Malaysia.

#### TARIKH KUAT KUASA

15. Arahan Pentadbiran ini berkuat kuasa mulai 1 November 2021 berdasarkan kelulusan Minit Mesyuarat LPU 160/05 pada 13 November 2021.

**"WAWASAN KEMAKMURAN BERSAMA 2030"**

**"BERILMU BERBAKTI"**



**(Y.A.M. TENGGU SYARIF LAKSAMANA PERLIS  
DATO' SERI DIRAJA SYED RAZLAN JAMALULLAIL)**

Pengerusi Lembaga Pengarah  
Universiti Putra Malaysia